

## KHUTBAH JUMAAT

### “HIJRAH DAN PIAGAM MADINAH” (14 Julai 2023M/ 25 Zulhijjah 1444H)

الْحَمْدُ لِلَّهِ، الْحَمْدُ لِلَّهِ الْغَنِيِّ الْحَمِيدِ، وَأَشْهَدُ أَنْ لَا إِلَهَ إِلَّا اللَّهُ  
وَحْدَهُ لَا شَرِيكَ لَهُ ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.  
اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ تَسْلِيمًا كَثِيرًا.  
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ  
مُسْلِمُونَ.

#### **Kaum Muslimin yang dirahmati Allah,**

Marilah kita bersama-sama mempertingkatkan ketaqwaan kepada Allah *subhanahu wata'ala* dengan melaksanakan segala perintah-Nya dan meninggalkan segala tegahan-Nya. Semoga kita beroleh kejayaan, kebahagiaan dan keselamatan di dunia dan di akhirat.

Khatib mengingatkan para jemaah agar memberi sepenuh perhatian kepada khutbah yang akan disampaikan dan tidak melakukan perkara-perkara yang boleh mengurangkan pahala Jumaat seperti berbual-bual dan menggunakan telefon. Oleh itu, marilah kita bersama-sama mendengar dan menghayati khutbah yang bertajuk: '*Hijrah Dan Piagam Madinah*'.

#### **Jemaah yang dirahmati Allah,**

Tahun baharu hijrah 1445H, tidak lama lagi akan kita tempuhi. Sewajarnya, setiap kali masuknya tahun baharu, kita berhijrah menjadi lebih baik berbanding sebelumnya. Bagi setiap orang yang

beriman, apabila semakin bertambah umurnya, maka semakin bertambahlah iman dan takwa kepada Allah *subhanahu wata'ala*.

Tahun baharu yang bakal ditempuhi, mengingatkan kita tentang peristiwa agung, hijrahnya Nabi Muhammad *sallallahu alaihiwasallam* dari Kota Mekah ke Kota Madinah bersama-sama sahabat. Begitu banyak iktibar dan teladan yang boleh kita ambil sebagai panduan dan motivasi dalam mendepani apa jua ujian yang dihadapi dalam kehidupan.

### **Hadirin yang dirahmati Allah sekalian,**

Ketaatan Nabi Muhammad *sallallahu alaihiwasallam* dan para sahabatnya terhadap perintah Allah *subhanahu wata'ala* ketika peristiwa hijrah seharusnya dijadikan teladan. Pelbagai tekanan dan penindasan yang dahsyat dari para Musyrikin Mekah terhadap mereka. Begitu tinggi keikhlasan dan keimanan umat Islam ketika itu yang menjadi kunci kekuatan untuk menyahut seruan perintah hijrah demi Islam dan demi kebaikan ummah.

Hijrah Rasulullah *sallallahu alaihiwasallam* bersama para sahabat telah membawa perubahan yang sangat besar dalam sejarah pengembangan agama Islam. Perancangan dan strategi yang kemas serta pertolongan dari Allah *subhanahu wata'ala* telah membantu kelancaran proses hijrah. Rasulullah *sallallahu alaihiwasallam* telah mengambil tiga langkah terpenting dalam memperkasa piagam Madinah.

Pertamanya ialah mendirikan sebuah masjid sebagai tempat ibadah bagi orang Islam dan tempat menyampaikan ajaran Islam serta berfungsi sebagai pusat pentadbiran Rasulullah. Keduanya ialah dengan mengikat tali persaudaraan antara kaum Ansar dan Muhajirin yang menatijahkan persefahaman seterusnya kaum Muhajirin dapat memulakan kehidupan yang baru dengan bantuan kaum Ansar. Ketiganya ialah dengan mengadakan perjanjian dengan orang Yahudi dalam rangka mempertahankan Madinah dari ancaman luar.

Dengan adanya strategi tersebut, maka kemudiannya terbentuklah satu perjanjian yang dikenali sebagai piagam Madinah. Apakah intipati piagam tersebut? Perkara utama yang terkandung dalam Piagam Madinah tersebut adalah Nabi Muhammad *sallallahu alaihiwasallam* menjadi ketua negara dan rujukan untuk semua penduduk Madinah sekiranya berlaku pertelingkahan.

Antara lain, intipatinya ialah penduduk Madinah ditegah bermusuhan, ditegah menanam api kebencian sesama mereka serta bersatu sebagai bangsa Madinah. Selain itu, bangsa Madinah bebas mengamal adat istiadat upacara keagamaan masing-masing, bekerjasama dalam memperkasa ekonomi, mempertahankan Kota Madinah dari ancaman luar serta jaminan keselamatan bagi mereka yang bukan Islam iaitu orang Yahudi ketika itu selagi mereka taat kepada piagam tersebut.

Namun, beberapa peristiwa peperangan yang berlaku di Madinah tidak dapat dielakkan kerana pengkhianatan dan ketidaksetiaan

terhadap piagam yang telah dimeterai, dilakukan oleh golongan Yahudi dan golongan yang bersekutu dengan mereka. Peristiwa peperangan-peperangan ini, dapat kita telusuri dalam kitab sirah.

### **Hadirin yang dirahmati Allah sekalian,**

Piagam Madinah ini diadakan bertujuan untuk menghadapi masyarakat Madinah yang majmuk, membentuk peraturan yang perlu dipatuhi bersama oleh semua penduduk, menyatukan kepelbagaian kaum, mewujudkan perdamaian dan melenyapkan permusuhan, mewujudkan keamanan di Madinah, menentukan hak-hak dan kewajiban Nabi Muhammad *sallallahu alaihiwasallam* dan penduduk setempat, memberikan garis panduan pemulihan kehidupan kaum Muhajirin, membentuk kesatuan dari sudut politik dalam mempertahankan Madinah, merangka persefahaman dengan penduduk bukan Islam dan memberi peruntukan pampasan kepada kaum Muhajirin yang kehilangan harta benda dan keluarga.

Apakah yang menjadi prinsip Piagam Madinah? Sudah tentu Al-Quran dan Sunnah menjadi sumber hukum negara, kesatuan ummah dan kedaulatan Negara, kebebasan bergerak dan tinggal di Madinah, hak dan tanggungjawab dari segi ketahanan dan mempertahankan negara, dasar hubungan baik dan saling bantu-membantu antara semua warganegara, tanggungjawab individu dan negara pemerintah dalam menegakkan keadilan sosial, menjalankan undang-undang keselamatan, kebebasan beragama, tanggungjawab negara terhadap orang bukan Islam dan kewajiban semua pihak terhadap perdamaian.

## **Hadirin yang dirahmati Allah sekalian,**

Persaudaraan merupakan perkara terpenting dalam peristiwa hijrah. Kaum Muhajirin dan Ansar saling menjaga dan menghormati antara satu sama lain atas dasar iman dan takwa kepada Allah *subhanahu wata'ala*. Allah *subhanahu wata'ala* mengkhabarkan tentang keredhaan-Nya terhadap golongan ini dan mereka memperoleh kemenangan yang besar di akhirat kelak. Firman Allah *subhanahu wata'ala* dalam Surah at-Taubah ayat 100:

وَالسَّابِقُونَ الْأَوَّلُونَ مِنَ الْمُهَاجِرِينَ وَالْأَنْصَارِ وَالَّذِينَ اتَّبَعُوهُمْ بِإِحْسَانٍ  
رَضِيَ اللَّهُ عَنْهُمْ وَرَضُوا عَنْهُ وَأَعَدَّ لَهُمْ جَنَّاتٍ تَجْرِي تَحْتَهَا الْأَنْهَارُ  
خَالِدِينَ فِيهَا أَبَدًا، ذَلِكَ الْفَوْزُ الْعَظِيمُ.

**Maksudnya:** *“Dan orang-orang yang terdahulu - yang mula-mula (berhijrah dan memberi bantuan) dari orang-orang "Muhajirin" dan "Ansar", dan orang-orang yang menurut (jejak langkah) mereka dengan kebaikan (iman dan taat), Allah redha akan mereka dan mereka pula redha akan Dia, serta Dia menyediakan untuk mereka syurga-syurga yang mengalir di bawahnya beberapa sungai, mereka kekal di dalamnya selama-lamanya; itulah kemenangan yang besar.”*

Meskipun hijrah seperti peristiwa hijrah Rasulullah *sallallahu alaihiwasallam* tidak berlaku lagi pada zaman ini, tetapi konsepnya sentiasa bersesuaian sepanjang zaman. Kita sebagai muslim yang mukmin diseru untuk sentiasa berubah kepada sesuatu keadaan

yang lebih baik. Apa yang kita usahakan akan sentiasa dicatat oleh para malaikat dan kita sentiasa dalam pengawasan Allah *subhanahu wata'ala* sebagaimana dalam firman-Nya dalam Surah al-Ra'd ayat 11:

لَهُ مُعَقِّبَاتٌ مِّنْ بَيْنِ يَدَيْهِ وَمِنْ خَلْفِهِ يَحْفَظُونَهُ مِنْ أَمْرِ اللَّهِ , إِنَّ اللَّهَ  
لَا يُغَيِّرُ مَا بِقَوْمٍ حَتَّىٰ يُغَيِّرُوا مَا بِأَنْفُسِهِمْ , وَإِذَا أَرَادَ اللَّهُ بِقَوْمٍ سُوءًا فَلَا  
مَرَدَّ لَهُ , وَمَا لَهُمْ مِّنْ دُونِهِ مِنْ وَالٍ .

**Maksudnya:** *“Bagi tiap-tiap seorang ada malaikat penjaganya silih berganti dari hadapannya dan dari belakangnya, yang mengawas dan menjaganya (dari sesuatu bahaya) dengan perintah Allah. Sesungguhnya Allah tidak mengubah apa yang ada pada sesuatu kaum sehingga mereka mengubah apa yang ada pada diri mereka sendiri. Dan apabila Allah menghendaki untuk menimpakan kepada sesuatu kaum bala bencana (disebabkan kesalahan mereka sendiri), maka tiada sesiapaupun yang dapat menolak atau menahan apa yang ditetapkanNya itu, dan tidak ada sesiapaupun yang dapat menolong dan melindungi mereka selain daripada-Nya.”*

**Jemaah yang dirahmati Allah sekalian,**

Pada hari Jumaat yang penuh barakah dan dalam kesempatan ini, mimbar menyeru, marilah kita berhijrah menjadi individu yang sentiasa berusaha melakukan tugas dan ibadah menjadi lebih baik daripada sebelumnya seterusnya memberi manfaat kepada orang di sekeliling kita. Marilah kita berhijrah menjadi warganegara yang

lebih baik dan bersatu padu dalam menghadapi apa jua situasi yang dihadapi lebih-lebih lagi zaman yang mencabar ini.

Sejajar dengan keperluan muamalah umat Islam dari sudut perbankan dan ekonomi negara, mimbar turut menyeru kepada kepada seluruh umat Islam untuk sama - sama berhijrah, seterusnya memperkasa diri, keluarga dan masyarakat dalam pelbagai aspek kehidupan seperti menggunakan perbankan Islam kerana ia mematuhi hukum Syariah dan menjauhi amalan riba yang ditegah dalam Islam. Antara perintis wujudnya sistem perbankan Islam di negara kita ialah tertubuhnya Bank Islam sejak tahun 1983 dan masih wujud dan berkembang sehingga kini.

### **Kaum muslimin yang dirahmati Allah,**

Mengakhiri khutbah, beberapa perkara yang dapat diambil sebagai pengajaran dan iktibar buat kita semua dan boleh kita lakukan dalam kehidupan kita. Antaranya;

**Pertama** : Peralihan tahun bermaksud pertambahan umur setiap Muslim. Perteingkatkanlah keimanan, ketakwaan dan ibadah kepada Allah *subhanahu wata'ala*.

**Kedua** : Contohilah keperibadian Rasulullah *sallallahu alaihiwasallam* dan sirahnya seperti peristiwa hijrah serta jadikanlah ia sebagai panduan dalam mendepani kehidupan.

**Ketiga** : Sentiasalah berusaha dan berhijrah dalam erti kata lain, memperbaiki dan memperkasa diri serta membantu dan memimpin mereka yang berada di jabatan, lingkungan, tanggungan dan

sebagainya agar menjadi muslim yang taat dan berbakti kepada keluarga, masyarakat dan ummah.

Akhirnya, marilah kita bersama-sama menghayati firman Allah subhanahu wata'ala dalam Surah al-Nisaa' ayat 100:

وَمَنْ يُهَاجِرْ فِي سَبِيلِ اللَّهِ يَجِدْ فِي الْأَرْضِ مُرْغَمًا كَثِيرًا وَسَعَةً , وَمَنْ  
يَخْرُجْ مِنْ بَيْتِهِ مُهَاجِرًا إِلَى اللَّهِ وَرَسُولِهِ ثُمَّ يُدْرِكُهُ الْمَوْتُ فَقَدْ وَقَعَ  
أَجْرُهُ عَلَى اللَّهِ , وَكَانَ اللَّهُ غَفُورًا رَحِيمًا .

**Maksudnya:** “Dan sesiapa yang berhijrah pada jalan Allah, nescaya dia akan mendapati di muka bumi ini tempat berhijrah yang luas dan rezeki yang banyak. Dan sesiapa yang keluar dari rumahnya dengan tujuan berhijrah kepada Allah dan Rasul-Nya, kemudian dia mati (dalam perjalanan), maka sesungguhnya telah tetap pahala (hijrahnya) di sisi Allah. Dan Allah adalah Maha Pengampun lagi Maha Pengasih.”.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ  
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ  
الْعَلِيمُ. أَقُولُ قَوْلِي هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ  
الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ  
فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

## KHUTBAH JUMAAT KEDUA

الْحَمْدُ لِلَّهِ. الْحَمْدُ لِلَّهِ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ  
وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ  
صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا  
بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ لَعَلَّكُمْ تُفْلِحُونَ.

### **Kaum Muslimin yang dirahmati Allah,**

Kita hendaklah sentiasa melakukan kawalan sendiri dengan sebaik-baiknya bagi mengelakkan terdedah kepada bahaya wabak penyakit. Teruskanlah memohon keampunan dan bermunajat kepada Allah *subhanahu wata'ala* agar diangkat segala wabak dan musibah daripada kita dan dikurniakan keselamatan dan kesejahteraan buat diri, keluarga, masyarakat, negeri dan Negara.

قَالَ اللَّهُ تَعَالَى:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا صَلُّوا عَلَيْهِ وَسَلِّمُوا  
تَسْلِيمًا

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ، كَمَا صَلَّيْتَ  
عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا

مُحَمَّدٍ وَعَلَىٰ آلِ سَيِّدِنَا مُحَمَّدٍ، كَمَا بَارَكْتَ عَلَىٰ سَيِّدِنَا إِبْرَاهِيمَ  
 وَعَلَىٰ آلِ سَيِّدِنَا إِبْرَاهِيمَ، فِي الْعَالَمِينَ، إِنَّكَ حَمِيدٌ مَّجِيدٌ.  
 وَارْضَى اللَّهُمَّ عَنِ الْخُلَفَاءِ الرَّاشِدِينَ الْمَهْدِيِّينَ، سَادَاتِنَا أَبِي بَكْرٍ وَعُمَرَ  
 وَعُثْمَانَ وَعَلِيٍّ، وَعَنِ الصَّحَابَةِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ.  
 اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ  
 مِنْهُمْ وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ يَا قَاضِيَ  
 الْحَاجَاتِ.

Ya Allah, ampunilah dosa-dosa dan kesalahan kami, ibubapa kami, ahli keluarga dan guru-guru kami. Limpahkanlah kesejahteraan, kedamaian dan kebahagiaan kepada kami semua dalam kehidupan di dunia dan di akhirat.

Ya Allah, Ya Rahman, Ya Rahim! Berikanlah taufiq dan hidayat-Mu kepada kami semua dan juga kepada pemimpin-pemimpin Negara kami, khasnya kepada Seri Paduka Baginda Yang di-Pertuan Agong Malaysia, dan juga pemimpin-pemimpin negeri kami, khususnya Tuan Yang Terutama Yang di-Pertua Negeri Sarawak.

Ya Allah! Kurniakanlah kami rezeki yang halal lagi diberkati, hindarilah kami dari sebarang bentuk gejala rasuah dan pelanggaran kepada peraturan dan undang-undang. Kurniakanlah keselamatan dan kesejahteraan, jadikanlah kami ummah yang berkualiti dan berintegriti demi mencapai negara yang aman dan makmur serta mendapat perlindungan-Mu, ya Allah.

Ya Allah, Ya Dzal Jalali Wal Ikram! Ya Allah, kukuhkanlah perpaduan dan kesatuan kami dalam aqidah, ibadah dan akhlak di bawah pegangan Ahli Sunnah Wal Jamaah. Limpahkanlah ke atas kami nikmat keselamatan, kesihatan dan keafiatan. Kurniakanlah kesembuhan kepada mereka yang diuji dengan penyakit-penyakit dan bebaskanlah negara kami daripada segala perkara yang tidak diingini dan wabak penyakit.

رَبَّنَا أُنْتَنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. أَمِينَ،  
أَمِينَ يَا رَبَّ الْعَالَمِينَ.

عِبَادَ اللَّهِ. إِنَّ اللَّهَ يَأْمُرُ بِالْعَدْلِ وَالْإِحْسَانِ. وَإِيتَاءِ ذِي الْقُرْبَىٰ وَيَنْهَىٰ  
عَنِ الْفَحْشَاءِ وَالْمُنْكَرِ وَالْبَغْيِ. يَعْظُمُ لِعَلَّكُمْ تَذَكَّرُونَ. فَادْكُرُوا اللَّهَ  
الْعَظِيمَ يَذْكُرْكُمْ. وَاشْكُرُوهُ عَلَىٰ نِعْمِهِ يَزِدْكُمْ. وَاسْأَلُوهُ مِنْ فَضْلِهِ  
يُعْطِكُمْ. وَلَذِكْرُ اللَّهِ أَكْبَرُ. وَاللَّهُ يَعْلَمُ مَا تَصْنَعُونَ. أَقِيمُوا الصَّلَاةَ.